

Pasukan lawn bowls UiTM unggul

Oleh [Syafiq Aznan](#) - Mac 29, 2022 @ 6:56pm

syafiq.aznan@bh.com.my



Pasukan lawn bowls UiTM bersama Piala Pusingan yang dimenangi, (dari kiri) Farah Irdina, Mohd Nur Shahrin, Alif Saufi dan Mohammad Lokman.

KUALA LUMPUR: Pasukan lawn bowls Universiti Teknologi MARA (UiTM) berjaya mengungguli Kejohanan Lawn Bowls Kuala Lumpur Open Fours 2022 yang berlangsung di Kompleks Sukan Negara, minggu lalu.

Kejayaan itu hadir menerusi kemenangan yang dilakar oleh Farah Irdina Azmi, Muhammad Alif Saufi Shaifudin, Mohammad Lokman Mohd Isa dan Mohd Nur Shahrin Jamaluddin ke atas pasukan Dami's Properties Club menerusi keputusan 11-9.

Dami's Properties Club bukanlah lawan yang calang-calang memandangkan pasukan itu menampilkan bekas pemain SUKMA Selangor.

Sebagai juara, UiTM membawa pulang hadiah wang tunai RM6,000 serta piala pusingan selain turut dinobatkan sebagai pasukan terbaik pada kejohanan terbabit.

Muhd Nur Shahrin yang juga pemain merangkap pengurus pasukan mengakui kemenangan itu akan menjadi pembakar semangat untuk mereka terus melakar lebih banyak kejayaan selepas ini.

"Kemenangan ini adalah satu pemangkin dan kejayaan yang terbaik untuk Pasukan Lawn Bowls UiTM bagi persiapan menghadapi kejohanan di peringkat institut pengajian tinggi (IPT) Malaysia dan kejohanan terbuka di negara ini," katanya.

Terdahulu, UiTM mara ke final selepas menewaskan pasukan SUKMA Sabah (B) 10-9 manakala Dami's Properties Club pula mengetepikan menewaskan Majlis Perbandaran Klang (MPK) dengan keputusan sama.

Tempat ketiga pula dimenangi secara bersama oleh SUKMA Sabah (B) dan MPK.

Sebagai rekod, kejohanan itu mendapat penyertaan 51 pasukan dari seluruh negara termasuk Sabah dan Sarawak membabitkan pasukan negeri, persatuan sukan, kelab sukan, jabatan kerajaan, universiti dan pasukan SUKMA negeri.

Antara yang berentap adalah pasukan SUKMA Sabah, Sarawak, Pulau Pinang, Perlis, Pahang, Kedah, pasukan PDRM, MPK, Universiti Malaya (UM), Lembaga Hasil Dalam Negeri (LHDN), Institut Penyelidikan dan Kemajuan Pertanian Malaysia (MARDI) dan kelab persendirian.